

17. juli 2020

UKA 2020/74

Inatsisartut Suleriaasianni § 36 naapertorlugu apeqquteqaat aallaavigalugu oqallisissiatut siunnersuut una saqqummiuppara:

Meeqqat atuarianni, inuussutissarsiutinut, ilisimatusarfimmi il.il. ilinniartut ilitsoqqussaralugit kalaallisut oqaatsitik atorlugit inaarutaasumik misilitsittarnissaasa allatulluunniit misilitsittarnissaasa qanoq qulakkeerneqarsinnaanera pillugu apeqquteqaat aallaavigalugu oqallisissiatut siunnersuut.

(Inatsisartunut ilaasortaq Jens Napätôk', Partii Naleraq)

Partii Naleqqap anguniagaani allaqqavoq nunatsinni pisortatigoortumik kalaallit oqaasii oqaasiusut, inatsimillu tunngavilikkat. Taamaattumik ulluinnarni ingerlatsinermi nalinginnaasumik suliffeqarfinni tamani atugaalertariaqartut, pisortat ingerlatsineranni, kommuneni, Namminersorlutik Oqartussat suliffeqarfiutaanni tamani allaffissornermi ilinniartitsinermilu.

Kinguaariinni inuusunnerusortatta ilitsoqqussaralugit kalaallisut oqaatsitik atorlugit ilinniarsinnaanerannik ilinniakkaminnillu naammassinnissinnaanerannik periarfissiinissap qulakkeerneqarnissaa pillugu Partii Naleraq apeqquteqaat aallaavigalugu oqallisissiamik siunnersuuteqarpoq.

Taamak qulequtsiinnermut tunngaviuvoq Partii Naleqqami paasinnineq malillugu atuartut ilinniartullu atuarifimmini ilinniarfimminnilu aallartikkaangamik oqaatsitigut piginnaasaat killeqartarmata. Ilitsoqqussaralugit kalaallisut oqaatsit aallaavittut paasinarluoruaataasinnaanerunertik ilisarnaatigaat – taamaalillugillu atussallugit toqqissisimanarnerutittarlutigit. Atuartut kalaallisut ilitsoqqussaralugit oqaaseqartut atuarifimmi, inuussutissarsionnermut ilinniarfimmi imaluunniit ingerlaqqiffiusumik ilinniakkami ilitsoqqussaralugit kalaallisut oqaatsitik atorlugit inaarutaasumik misilitsissinnaagunik qularnanngitsumik ilinniakkaminni ingerlalluarnerusinnaasut tusartarpavut. Tamanna qanoq iliorluta qulakkeersinnaavarput?

Ilinniartitsisunik misilitsinnermilu nalileeqaataasartunik censorinik – kalaallisut danskisullu oqaatsitigut piginnaasaqartunik - amigaateqartugut nalunngilarput, tamannalu pillugu soorunami siumut ungasissumut isigisumik iliuuseqartariaqarpugut. Amerlanerusunik ilinniartitsisariaqarpugut taamaalillutik taakku ilaat kingusinnerusukkut ilinniartitsinikkut aqqissuusaanitsinni ilaatinneqalerlutik, taamaalillutalu nukittorsaataasumik pitsaanerusup tungaanut ineriartornermik pilersitsilluta. Maannakkulli siunissamilu qaninnermi qanoq iliussaagut? Misilitsinnermi oqalutseqarsinnaaneq periarfissaava? Ilinniagaqarfiit atuarifillu nalileeqaataasussanik censorinik toqqaaniarnerminni ilinniartut/atuartut ataasiakkaat isumaliutiginnissaat pikkoriffiginerusariaqarpat?



Nalileeqaataasartoqarnikkut ataqatigiissaarisoqarnerusariaqarpa? Oqaluttariarsornikkut misilitsit-toqartillugu videokkut attaveqarsinnaaneq atorneqarsinnaava, taamaalillugit nalileeqaataasartut ilinniartitsisullu oqaatsitigut naapertuuttumik piginnaasaqartut angalanissaannut piffissaq atorneqartoq aningaasartuutillu annikillisinneqarlutik?

Ilinniartitaaneq Kalaallit Nunaata siumut aqqutissarigaa tamatta nalunngilarput – kinguaariinnilu inuusunnerusortatta piginnaasatigut piukkunnaateqarfigisaraluaminnik ilinniagaqalersinnaa-nerannut akornusiuttut piiarneqarnissaannut naalakkersuinikkut peqataasariaqarpugut. Taamatut takisuuliunngikkaluarluta naatsorsuutigaarput maani inersuarmi oqallilluarumaarluta.

Oqalliseqataalluarisi.